



Jahresbericht zur 2. Generalversammlung vom 6. November 2017

Clubjahr 2016/2017

Liebi Skiclubmitglieder, Skiclubvorstand

Zum 2. mal dörf i eu alässlich vonerä GV verzellä, dass euse chli Verein läbt, in Takt isch und ganz cooli jungbliebni Mitglieder hät.

S'Jahr 2017 im Rückspiegel:

Mir händ kulinarisch, sportlich und finanziel es guets Jahr hinter eus. Nöd zletscht gits usätzstrichä, dass es organisatorisch kei Pannä gä hät und mir ebäsowenig Unfall oder ähnlichi Belsurä verzeichnet händ.

Mit äm traditionellä Skitag vom Restaurant Friedä im Hoch Ybrig sind mir id Skisaison gstartet. Ganz en tollä Schneetag mit er ä perfektä Organisation vom Heinz. I dä Laucherä Hüttä simmer im Näbel itaucht, aber obä usä für D'Skifahrer häts en herrlich blauä Usblick über äm Näbelmeer bereit gha. Das hät richtig gfägt.

Dänn spöter am Abig im Restaurant Friedä bi dä Claudia hät es feins Fondue uf eus gwartet. Eimal me Grossartig!

Im März hämer es verlängeräts Sportweekend i dä Flumserberg im Rest. Tanneboden chönä duräfuera. A dä flumser Aelplerchilbi sind mir quasi VIP Gäscht gsi und Spass häts gmacht. Uf dä Ski sind einigi bi schönschem Wätter uf richtig viel Kilometer cho. Au dä gmuetlich Teil isch a dännä Tagä ganz und gar nöd vergässe gangä.

Bim heissä Juli Summerfäscht im Schuelhuus Chäferholz simmer wieder bi eusem Kassier Res und sinerä Frau Sandra als stunendi Gescht debi gsi. Wieder en lässigä Nammitag bi super Ässä und mit em Erich als Lotto Papscht und erä Zaubervorschtellig vo mir wo grad au no glückt isch.

Jetzt no dä gschäftlich Teil:

Mir händ 1 Vorstandsigä gha, 1 Vorstandsässe, 1 Revisorä Abig und 1 Generalversammlung. Ein Ustritt i dä Person vom Jürg Brändli und ein Neuitritt dur dä René Lüttin. Herzlich Willkommen !

Dä Verein isch mit Mitglieder inkl. Vorstand gemäss Statutä mit 25 Personä voll bsetzt. Also usverhaufft !

S'Jahr 2018 i dä Vorschau:

Au im nöchschtä Jahr möchtä mir im Februar wieder am Skitag vom Restaurant Frieden mitmachä.

Au euses Summerfäscht im Juli isch i dä Planig.

Zudem hämmer im März vor , es verlängerets Skiweekend im legendäre Zermatt durezführe. Alli Vorbereitige sind bereits agloffä.

Dä eint oder ander Clubhöck wär no glatt und wer weiss, ess git no Sachä szmachä wo mir jetzt no gar nöd devo wüssed.

Ehrigä:

Es hät gradi Geburtstäg gä:

- Dä René Lüttin isch im März 50i wordä. Applaus !
- Dä René Nikles isch geschter 80i wordä. Applaus !

Eu tollä Mitglieder und minä Vorstandskollegä dankä ich ganz herzlich für D'unterstützig, dä Grippe und Tatädrang für glungeni Aläss und für D'Frünschaft.

Fürs neue Jahr wünschä ich eu au im Namä vom Vorstand viel Elan, Gsundheit und unfallfrei i Skitäg.

Dä Presidänt
Richi Eschmann